

13/7/82 13 JUL 1982

RENCANA PENGARANG

# Berita Harian

AKHBAR RAKYAT, AKBAR ANDA

SELASA, 13 JULAI, 1982

## DISIPLIN, KESUNGGUHAN DAN ILMU PENGETAHUAN

ISRAEL mempunyai sebab untuk menjadi begitu sombong dan ganas terhadap orang-orang Arab dan agama Islam. Mereka terpaksa menunggu 1,400 tahun untuk dapat kembali dan menegakkan negara Israel itu, dan kemudian, dalam tempoh singkat sejak 1948 saja ia telah muncul sebagai negara yang maju ekonomi dan ketenteraannya. Dalam tempoh itu bangsa Yahudi yang begitu lama tidak bernegara dan dibanci di seluruh dunia itu telah berjaya menundukkan semua bangsa Arab, membelakangkan fikiran dunia.

Tetapi dalam masa mereka tidak bernegara dan hidup terhina itu bangsa Yahudi tidak pernah menangi nasib saja. Sebaliknya setiap anak Yahudi diajar supaya menanamkan azam untuk suatu hari kembali ke negara mereka. Untuk mencapai cita-cita ini bangsa Yahudi dari generasi ke generasi di negara-negara tempat mereka menumpang telah meningkatkan taraf ekonomi mereka dan menimba ilmu pengetahuan setingginya. Hasilnya, apabila peluang terbuka untuk

mereka menubuhkan negara Israel di bumi Palestin tahun 1948, bangsa Yahudi itu bukan saja sudah bersedia dari segi semangat tetapi juga ekonomi dan ilmu pengetahuan dalam segenap bidang.

Ini semua dapat mereka capai melalui disiplin yang amat ketat dan kesungguhan yang luar biasa. Cuma dengan kesungguhan dan disiplin yang hebat itulah saja mereka berjaya mengumpulkan kekayaan dan ilmu pengetahuan di perantauan, tanpa hasil asas tempat bertapak. Bangsa-bangsa Arab, sebaliknya, boleh dikatakan duduk di atas kekayaan minyak. Tetapi mereka amat kurang dalam disiplin, kesungguhan dan ilmu pengetahuan. Kerana itu kekayaan mereka terpaksa diusahakan oleh orang lain untuk mereka. Kemajuan dan pertahanan mereka terpaksa ditentukan oleh orang lain. Inilah yang mendedahkan mereka kepada muslihat dan manipulasi politik kepentingan negara-negara industri. Akibatnya ialah perpecahan sesama bangsa Arab, pembelakangan ilmu pengetahuan, dan

kelemahan yang berterusan, yang sehingga baru-baru ini, menyebabkan mereka hanya dapat memandang sahaja Yahudi dengan biadab mencerooboh dan menzalimi rakyat Palestin di Lebanon.

Perdana Menteri, Datuk Seri Dr. Mahathir Mohamad, berkali-kali mengingatkan umat Islam di negara ini khususnya dan seluruh rakyat amnya supaya mengamalkan sikap berdisiplin, bersungguh-sungguh dan tidak jemu menimba segala ilmu pengetahuan. Sebabnya adalah sama. Negara kita juga mempunyai hasil yang baik. Agama Islam adalah agama rasmi negara. Tetapi jika umat Islam hanya berpeluk tubuh pada ketika orang lain berdisiplin dan bersungguh-sungguh bekerja dengan menggunakan segala ilmu pengetahuan yang telah mereka kumpulkan, akhirnya kita hanya akan terganggu melihat kekayaan itu diangkut di depan mata kita. Apabila umat Islam lemah, orang tidak akan menghormati kita, dan taraf agama rasmi bagi Islam itu tidak disegani.

No. Siji 2893